



Stad kommune

# Vedtekter kommunale barnehagar

## Gjeldande frå 15. august 2020



Arkivsak: 20/898

Sak 20/025 : Utval for oppvekst og opplæring, 29.04.2020

### **§ 1: EIGARTILHØVE**

Stad kommune eig og driv dei kommunale barnehagane.

Barnehagane i kommunen er eit pedagogisk tilrettelagt tilbod for barn i førskulealder.

Utvalet for oppvekst og opplæring er det politiske organet som ivaretek kommunen sine oppgåver innanfor barnehagesektoren. Barnehagane i Stad kommune skal drivast i samsvar med lov, forskrift og kommunale vedtak.

### **§ 2: FØREMÅL**

*"Barnehagen skal i samarbeid og forståing med heimen ivareta dei behov barn har for omsorg og leik, og fremje læring og danning som grunnlag for allsidig utvikling.*

*Barnehagen skal bygge på grunnleggande verdiar i kristen og humanistisk arv og tradisjon, slik som respekt for menneskeverdet og naturen, på åndsfridom, nestekjærleik, tilgjeving, likeverd og solidaritet, verdiar som kjem til uttrykk i ulike religionar og livssyn og som er forankra i menneskerettane.*

*Barna skal få utfalde skaparglede, undring og utforskartrang. Dei skal lære å ta vare på seg sjølv, kvarandre og naturen. Barna skal utvikle grunnleggande kunnskapar og dugleikar. Dei skal ha rett til medverknad tilpassa alder og føresetnadar.*

*Barnehagen skal møte barna med tillit og respekt, og anerkjenne barndomen sin eigenverdi. Den skal bidra til trivsel og glede i leik og læring, og vere ein utfordrande og trygg stad for fellesskap og vennskap. Barnehagen skal fremje demokrati og likestilling, og motarbeide alle former for diskriminering." Lov om barnehagar § 1.*

### **§ 3: OPPTAK AV BARN**

Det er eitt hovudopptak til barnehagane i Stad kommune. Dette vert gjort i april og gjeld frå nytt barnehageår i august. Ved ledige plassar kan kommunen gjere opptak gjennom året.

Alle nye som ønskjer barnehageplass for neste barnehageår, må søkje innan fristen for hovudopptaket. Dei som ønskjer endringar i plass, søker også til denne fristen.

Opptaket er samordna mellom barnehagane i kommunen. Opptaksmynde er kommunalsjef for oppvekst og opplæring. Kommunen er opptakskrins.

Det er høve til å søkje slik plass: 3, 4 eller 5 dagar pr. veke.

Barn har rett til barnehageplass i tråd med Lov om barnehagar § 12 a. Barn som fyller 1 år seinast innan utgangen av august det året det søker om barnehageplass, har etter søknad rett til å få plass i barnehage frå august månad. Barn som fyller 1 år i september, oktober eller november det året det søker om barnehageplass, har etter søknad, rett til å få plass i barnehage innan utgang av den månaden barnet fyller 1 år.

#### **Opptak til plass i barnehage vert gjort etter følgjande kriteria:**

- Barn med nedsett funksjonsevne.
- Barn med vedtak etter lov om barneverntenester §§ 4-12 og 4-4 andre og fjerde ledd.
- Barn som etter ei samla vurdering av barnet og foreldre sin livssituasjon har eit særleg behov for barnehageplass kan prioriterast framom andre, her også søsken i same barnehage.
- Barn som har plass i den aktuelle barnehagen og som ønskjer auke av plassen.
- Barn som har eitt år att i barnehagen før skulestart.
- Andre søkjarar og barn som har hatt plass i familiebarnehage.

For at formålsparagrafen i barnehagelova skal bli ivareteke på ein god måte, plasserer kommunalsjef barna i dei ulike barnehagane etter ei vurdering der det vert teke omsyn til ei best mogleg gruppesamansetting med tanke på alder, kjønn osv., i tillegg til foreldra sine behov.

Barn som har fått plass, har denne plassen ut barnehageåret (tom 14.august) det året barnet byrjar på skulen eller til plassen vert sagt opp.

#### **Klage på opptak**

Foreldre/føresette kan klage på opptaket etter reglar i Forvaltningslova.

#### **§ 4: OPNINGSTID – TILBOD**

1. Barnehagane i Stad kan gje tilbod om barnehageplass frå 3 til 5 dagar pr. veke. Fordelinga mellom dei ulike plassane vert fastsett for kvar einskild barnehage ved opptak.
2. Utvalet for oppvekst og opplæring fastset årleg barnehageruta. Barnehageruta fastset barnehagane si daglege opningstid og om barnehagane skal vere stengde i visse periodar.
3. Ferie:  
I løpet av barnehageåret skal alle barn ha 5 veker ferie.  
Ei veke blir brukt i samband med planleggingsdagar fordelt på heile året, jfr. barnehageruta.  
Minst 3 veker samanhengande skal i hovudregelen takast ut i tidsrommet 15.05.-15.08.  
Fastsetjing av ferie må avtalast med den einskilde barnehage i god tid: Før 14.april.  
Dersom nokon ynskjer unnatak frå hovudregel, søker ein skriftleg til styrar i barnehagen på førehand.
4. Dagar der det erfaringsmessig er redusert barnetal, kan barnehagen føreta ei kartlegging for å tilpasse bemanninga.

#### **§ 5: FORELDREBETALING**

Stad kommune har maksimalpris og fylgjer moderasjonsordningar etter «Forskrift til foreldrebetaling i barnehage» og gjeldande reglar om redusert foreldrebetaling. Kommunestyret fastset årleg betalingsattsar og betalingsordning for barnehagane. Ved delt foreldreansvar er begge foreldra ansvarlege for betaling av barnehageplassen.

I særlege tilfelle kan det gjevast permisjon frå barnehagen med fritak for foreldrebetaling.

Betaling for barnehageplass forfell den 20. kvar månad, gjeldande for inneverande månad. Dersom foreldrebetaling har stått til forfall i 2 månader, vert det sendt ut brev frå Stad kommune med ny betalingsfrist. Viss kravet ikkje er betalt innan denne fristen, vert føresette innkalla til møte med administrasjonen i Stad kommune. Dette for å inngå betalingsordning med kommunen eller finne ei anna løysing.

Ved for sein eller manglande betaling gjeld økonomireglement Stad kommune.

#### **SØSKENMODERASJON:**

- 30% moderasjon for barn nummer to.
- 50% moderasjon for dei øvrige barna.

Moderasjonen gjeld sjølv om barna er i ulike barnehagar i kommunen.

#### **§ 6 : OPPSEIING AV Plass/ DELAR AV Plass**

Dersom ein ynskjer å seie opp barnehageplassen, skal det skje skriftleg. Ein seier opp barnehageplass via nettstaden: [www.vigilo.no](http://www.vigilo.no) (via foreldreportalen) .

Plass i barnehagen kan seiast opp frå den 1. i kvar månad med minst ein månads varsel. Det skal betalast vanleg foreldrebetaling i oppseiingstida sjølv om barnet ikkje nyttar plassen.

## **§ 7: FORELDRERÅD OG SAMARBEIDSUTVAL**

### **Foreldreråd**

Kvar barnehage skal ha eit foreldreråd der foreldra/føresette til alle barna i barnehagen er medlemmar. Styraren i barnehagen syter for at det vert kalla inn til det første møtet i kvart barnehageår.

Det vert halde 2 foreldremøte i året – foreldrerådsmøta er gjerne knytt opp mot desse møta. Det er viktig for samarbeidet at alle foreldre møter på foreldremøte.

### **Samarbeidsutval**

Kvar barnehage skal ha eit samarbeidsutval samansett av  
2 representantar for foreldra/føresette, valde av foreldrerådet for 1 år  
2 representantar for dei tilsette, valde av personalet for 1 år  
1 representant for kommunen, vald av utvalet for oppvekst og opplæring for 4 år  
Styrar er sekretær i samarbeidsutvalet – utan stemmerett.

Kommunen kan bestemme at det skal vere felles samarbeidsutval for barnehage og skule.

## **§ 8: INTERNKONTROLL**

Barnehagen har utarbeidd dokumentasjon etter fastsett forskrift om internkontroll i høve til:

- Lov om miljøretta helsevern i barnehagar og skular
- Lov om arbeidsmiljø
- Brannvernlov
- Lov om produktkontroll.

Dokumentasjonen omfattar mål, rutinar og prosedyrar for å ivareta helse, miljø og tryggleik.

## **§ 11: ENDRING AV VEDTEKTENE**

Kommunestyret eller det organet som kommunestyret delegerer myndet til, godkjenner vedtektene for dei kommunale barnehagane i Stad kommune og avgjer eventuelle tvistar kva gjeld tolking av vedtektene. Ved omfattande revisjonar skal desse sendast ut til høyring i barnehagane før endeleg vedtak blir gjort. Reviderte vedtekter vert gjort gjeldande for alle etter at dei er politisk godkjende – også for dei som tidlegare har fått fast plass.